

Бірлігі жарасқан, Тәуелсіз елім бар!

ПРЕЗИДЕНТ ЖӘНЕ ХАЛЫҚ


Қазан 2008 жылы
27-саныдан бастап



Республикалық қоғамдық-саяси газет

Республиканская общественно-политическая газета

Тәуелсіздік күрдастары жайлы сыр-десте



Тәуелсіздіктің күрдасы, дәуірдің алғыр сырласы жанымнан артық көретін жан балам-ай – Даниярым-ай, дара туған, арман қуған Данашым-ай, сенің жүрегің соқпағалы, ата-анаң үшін өмірдің тойы тоқтағалы үш жыл. Содан бері тәуелсіздіктің көк байрағы желбіреген Елдің де, ел қамын жеген ердің де, өзіңсіз өкісіп жүрген маңдайының соры бес елі сормандай ата-анаңның да басынан талай жайлар өтті.

Жарық дүние дейтін жалғанда армансыз адам жоқ. Төрт құбыласы түгел кім бар дейсің? Болды, толды дейтін, сырт көзге бақытты дейтін пенденің де ең болмағанда жүректі өртер бір өкініші болады. Жарты әлемді жаулап алған Шыңғыс ханның да өзекті өртеген өкініші көп еді. Қаһарынан қара жер қалтыраған Наполеон да: «Мен бақытты бола алмадым» деп жазыпты. Бір кем дүние.

Сол кемдік сенің артыңда уақытша қалған, әзірше бір жығылып, бір тұрып қалт-құлт етіп жүрген, өзіңнен адасып сорлап қалған сорлы әкең менің де басымда бар. Осынша жасқа келгенше талайды бастан өткердім. Тас кедергі тағдыр мені отқа да салды, тасқын суға да лақтырды. Бірақ отқа да жанбадым, суға да батпадым. Дара туған даналығымнан емес, әрине. Алла тағаланың әмірімен тура келген сан ажалдан аман қалдым. Бұрынғыларын өзің де білесің, Данашым! Сен өмірден озғаннан кейінгісін айтсам алдымен бір Алланың, сосын Елбасының арқасында осы жылы наурыз айының 16-жұлдызында Сеулде күрделі операция жасатып, тағы бір ажалдан аман қалдым.

Осы жолдарды ауруханада жазып отырмын. Алда аяққа жасалатын өте күрделі тағы бір операция тұр. Құдай қаласа, одан да аман қалармын деген үмітім бар. Ендігі ең басты арман – сол сыннан аман өтіп, қалымымен өзіңе – ұлға ғана емес, ұлтқа да қызмет ету. Анаң екеуміз өзің жайлы үш кітап және сосын «Махаббат пен мейірімнен өрілген өмір» атты деректі кино шығардық. Сенің өмірден озғанына тамыз айының 17-жұлдызында үш жыл болды. Соған орай ас беріп, құран оқыттық. Тәтті өтіріктен ащы шындық артық. Ащы да болса ашығын айтайын анаңның жағдайы менен де ауыр, өзін емес өзгені ойлаумен өтіп жатқан өмір оған оңайға соққан жоқ. Жанұяның бар

ауыртпалығын бір өзі көтерумен келе жатқан ол ең алдымен сені ойлайды, менің барлық жағдайымды жасап нәп-нәзік болып ауыр жүкті бір өзі арқалаумен денсаулығын да әлсіретіп алды. Өзіңнен адасып қалғалы көзінің жасы бір құрғаған жоқ. Соның салдарынан сол көзі мүлдем көрмейді қазір. Оң көзі де күн сайын нашарлап барады.

Күн сайын кеміп бара жатқан анаң Құралайдың денсаулығы, жатсам-тұрсам тілейтінім соның амандығы. Ол бар болса мен де бармын, ол жоқ болса мен де жоқпын өмірде. Оған деген қарызым шашымнан көп. Сол қарызымның жүзден, бәлкім мыңнан бірін өтеу үшін де, ең бастысы ұлға да, ұлтқа да қызмет ету үшін алдағы аса ауыр операцияны сәтті өткізе көр деп тілеймін Алла Тағаладан.

Өзіміз жайлы өзіңе берген қысқа есебіміз осы. Ең басты – Елдің жайы ғой. Қысқа қайырсам, ел аман, жұрт тыныш. Тәуелсіздігіміздің мәңгілік болуы үшін сенің достарың, тәуелсіздік құрдастары, солардың қатарында жанып сүйген жан жарың Анжелика Досанова да жемісті еңбек етіп жүр.

Осынша жасқа келгенше талайды бастан өткердім. Бал да таттым, у да іштім бұл өмірде. Соның бәрін саралап, салмақтап келгенде күні кешеге дейін бақытты едім мен бейбақ. Мені асу бермес асқарларға алып ұшқан қос қанатым бар еді. Оның бірі – қаннан да қымбат, жаннан да тәтті – Тәуелсіздік, бірі өзің едің Данашым!

Жанымнан артық көретін Даниярым–Данашым. Сені жоғалту ата-анаң үшін бауыр еті баласын жоғалту, ел үшін тәуелсіздіктің мәңгілігі үшін қызмет ететін жас қайраткерді жоғалту. Қайғы жұтып, қансыраған жүректі тұз сепкендей онан сайын ауыртатын тағы бір ауырлық сен, мен сияқты қатардағы көп пенденің бір емес, дара туған дана едің. «Жаратқанның пендесіне берілген үлкен сыйы – оның артында қалатын жақсы аты, мейірімділігі мен қайырымдылығы», – депті Сағди. Сен өте мейірімді, аса қайырымды едің, Данашым. Сол қайырымдылығыңмен сексендегі секілдеген кейуана Алтынды ажалдан алып қалғаныңды ел әлі күнге дейін сыр ғып, жыр ғып айтып жүр.

Даниярым – Данашым! Сондай қиын сәтте қаламыма сүйенемін. Сондай сәттерде туған жыр жолдарының бір үзегінде:

Айналып барам зомбиға,
Ұқсаймын қаңғыбасқа да.
Өңештен тамақ өтпейді,
Тәбет жоқ таңғы асқа да.

Жылауменен өтетін,
Күнге де төзіп келемін.
Табыттай ауыр ой басқан,
Түнге де төзіп келемін.
Көкбөрі ұқсап ұлимын,
Күйіктен ішім өртеніп,
Тірі өлік болып жүрмін мен,
Аяулы ұлым ерте өліп, – деп жаздым.

Сені ойласам, көз алдыма сенің құрбы достарың – тәуелсіздік құрдастары келеді көз алдыма. Иә, келешек – жастардікі. Жүрегі «ел» деп соққан тәуелсіздік құрдастары, олардың ізін басып, өмірге сосын гүл жара келетін жаңа бір ұрпақ жас құрақтай жайқалып өсіп, тәуелсіздікке тәу етіп, ел еңсесін еңбегімен, талантымен биіктете бермек. Ендігі үміт соларда.

Алланың нұры түскен, айналайын, Даниярым – Данашым, сені сағынып, шыбын жаным шырқырағанда сыздаған жаралы жүрегімді жұбататын бір жай – еліміздің ертеңіне деген сенім. Ол сенімнің серігі, тірегі жастар, Сенің қатар құрбы достарың – Тәуелсіздік құрдастары Кеңестің шекпенінен шыққан біз сияқты жалтақ, жасқаншақ емес, рухы асқақ ұлтшыл, елшіл, мемлекетшіл, халықшыл. Тәуелсіздіктің мызғымас мықты тірегі де, елдің ыстық жүрегі де, қазақ халқының келешегін кемел ететін де солар. Сендер аман болындар жүрегі ел деп соққан, Даниярым – Данашымның жан Достары – Тәуелсіздік құрдастары!

Сәбит ДОСАНОВ,
жазушы, Мемлекеттік сыйлықтың лауреаты,
Халықаралық сыйлықтардың лауреаты